

東三省鹽法新志

奉節張朝墉署

東三省鹽法新志卷三十一

交涉篇二

三十三年正月則有公主嶺日警干涉華商高士芳販私之案

舊志光緒三十三年正月日本總領事館照會交涉局文云

准公主嶺鶴岡警務署長照稱懷德縣大榆樹住民高士芳

於貴歷光緒三十二年十二月二十五日在關東洲大連清

商盛成興油房購買食鹽五十六石由鐵道向公主嶺運送

西歷二月十日

中十二月二十八日

到公主嶺不料東三省鹽務總局

公主嶺分局長丁九春使部下巡丁二名向當時寓居該處

之高士芳查詢將高士芳所挈之貨物引換證押收並將堆

積火車站內之食鹽全部扣留運赴分局等因查元來關東

洲所產鹽之輸出目下貴我之間正在協商現在尙未議定
貴處即施沒收等手段殊悖和衷共濟之主旨徒使此事不
能早行解決且丁分局長並不向警務署及本館爲何等之
交涉竟在鐵路附屬地內執行職務最爲不合未免啟後日
貴我踰越職域之端務請即速懲戒丁分局長並將扣留之
食鹽全數交由公主嶺鶴岡警務署長還給所有之貴國人
爲盼 交涉總局照覆日本駐奉總領事云查中國法律凡
食鹽一項非由官允許准賣者概爲私鹽既屬私鹽除沒收
外尙須將販賣私鹽之人照律重懲今中國人高士芳所犯
之罪即係應照此律科斷至其鹽係何處所出在所不計也
貴國之警務署我國並未承認且該處鹽務分局長非以職

權擅至車站搬運該鹽係持引換證前往受取者也其行爲確係正當貴國警務署長不無誤解相應照覆貴總領事請煩轉飭該處鶴岡毋須過問此事爲要 日本駐奉總領事照會文云查分局丁九春持引換證受取非普通商人之行爲查鹽務分局長於職務上使用引換證即押收食鹽行爲之一部貴處此時當以丁分局長所行爲不當將該分局長處罰其所押收之食鹽一旦交由鶴岡警務署歸還所有人之後再由貴處官憲任意處罰可也若不明定貴處之過失將貴我間雖有踰越職域之事本處不負何等之責任也鹽務總局咨覆交涉局文云案准貴總局移開前准日總領事照會爲華商高士芳由大連灣購運食鹽一案請迅賜札

飭該分局長將辦理情形詳細具報以憑核辦准此當經札飭公主嶺分卡刻日具報茲據申稱光緒三十二年十二月二十七日據懷德縣大榆樹高士芳來局報稱伊於是月二十五日由大連成盛興油房買鹽五十六石計三萬三千八百四十五觔當敝卡驗無奉天將軍印票自應照章充公究辦是以飭該犯於二十八日自行將鹽觔卸運到局誠恐該犯乘間脫逃遂派巡差兩名跟隨防範高士芳畏罪再四託保仰懇轉詳免究因思該犯自行首報似與偷漏拏獲有別遂將該犯交保人暫保候案委員即便乘輪赴省稟蒙總局准將鹽觔照章全數充公該犯姑寬免究即於正月初七日旋局遵將高士芳取保釋歸事閱多日忽於正月十七日有

公主嶺日本警務員鶴岡來局詢問鹽飭情由遂即告知係
華人高士芳販無票私鹽現已稟明充公在案日員即將鹽
數人名日期抄單携回次日又約委員到日本警察處接談
據稱高士芳之鹽原在鐵道之內貴局不應派兵兩名越界
運鹽當即與其辯明鹽係該本人親赴車站自投載紙僱車
取運來局非差巡所取運也至派巡差二名實係防範該私
販逃逸起見鶴岡當亦明白了然遂面訂嗣後鹽飭落站無
論是否私鹽均須先行知會貴局不必越界拉鹽拏犯如運
往鐵道以外售賣任憑貴局拏辦伊不與聞如查出委係無
票私鹽並許幫同送信以篤邦交等語忽於正月十九日該
犯高士芳來局藉勢刁橫彼時稟奉電飭將該犯解省發縣

訊究據高士芳供認販運私鹽爲貧所迫出具永不敢再犯
甘結當堂開釋行知在案茲准前因查高士芳已自行投局
報驗何庸越界緝拏該火車載運貨物係貨主持載紙經車
站驗明方能取運果有不合當時何不理阻何竟致事閱半
月有餘而忽生枝節始來局詢問人名石數並訂此後辦法
暨許幫同查私之雅意此次私鹽係該犯自投自運實非巡
差在火車拿犯在火車搬運也且當卸運此鹽並係高士芳
自行價僱日人公司經手衆目昭彰非可遁飾據此查此案
高士芳所販私鹽係自行投局報明自行卸運到局候辦既
非該卡在車站捕拿亦非該卡持貨單卸運與日本警察毫
無干涉何得指爲越職何須交回該站且鐵路敷設中國境

內與租界不同其地面一切事宜仍當在中國治權之內非日本官吏所應干預此後若有食鹽運到各站若經各局卡查係私鹽當由各局卡委員即便拿辦該站日官不得阻攔包庇以符約章而敦交誼 交涉局照覆日本駐奉總領事文云案查高士芳私運食鹽被公主嶺緝私分局押收一案當經本局移請鹽務總局轉飭查覆去後茲准復稱高士芳所販私鹽係自行卸運到局既非職權至車站捕拏亦未自持引換證前往受取至於派差防範係該分局應盡之職務則其行爲始終毫無不合非貴國人所可干預等因合行照覆貴總領事請煩查照以後如有私鹽運到各局卡查出後仍應照例拿辦 日本駐奉總領事照覆仍以公主嶺鹽務

分局長在火車站附屬地內擅以職權押收食鹽請照本館前次公文將物品交還所有主並將在我附屬地內擅行職權之分局長及巡丁等處罰又所云我國非可干涉一語甚爲不當蓋該分局在我附屬地內擅執行職務自應拒絕若以後再有亂用職權拏辦之事時我不但干涉當以相當之手段對付請查照可也 交涉局照覆云查此案前准貴總領事第四十二號公文以該分局長爲踰越職域執行職務故本局以丁字第十八號公文答辯云該分局長非以職權擅至車站搬運係持引換證前往受取所謂持引換證者言令高士芳持引換證往取也嗣因貴總領事第四十九號公文誤解以該分局長使用引換證爲不當一若該分局長自

持引換證往取故又以丁字第五十一號公文答辯云該分局長既非以職權至車站捕拏又未自持引換證前往受取其說明甚不知貴總領事何以誤解而謂前後矛盾至派巡兵同往係爲防高士芳脫逃起見自係該分局長應盡之職務譬如我國解一要犯附坐南滿洲鐵道火車豈亦不准巡丁同往耶是該分局長行爲始終毫無不合所謂予以處分並將鹽發還所有主本局實難承認至以貴國非可干涉一語爲不當且云當以相當之手段對付查原來貴我各守職域如有踰越自應拒絕但以毫不踰職之人而強加以越職之罪則此等手段恐亦不當合再照覆請查照可也

二月則有日商中馬熊由旅順販運無票私鹽之案

舊志交涉局照會日本領事文云案奉軍督憲札開日商中馬熊由旅順販運無票私鹽六十四包至長春被緝私分局扣留該商不服聲稱當赴長春日領事館稟控一事前據東三省鹽務總局呈報當經電咨吉林將軍請照會長春日領事按約懲辦在案茲准電復已飭長春府照會日領事按約辦理札令本局知照日總領事等因奉此相應照抄原札並電稿照會貴總領事查照 又照覆日本駐奉領事文云本年二月二十七日接准貴總領事第二十八條公文內開長春鹽釐分局因貴國人將金縣購買之鹽運往長春無奉天省納稅印票即行差押頗爲不當等因查鹽觔爲我國專賣之品本屬不許外人販運即照章納稅亦無允許明文此次

該局扣留私販鹽觔並非不正當之處本軍督因租界地內
鹽灘應歸我國管理終須與貴總領事議定辦法所有私販
鹽觔既經扣充入官暫不照請貴總領事查阻今貴總領事
反要求賠償毋乃本末倒置至謂貴國人有不正行爲無何
等之交涉即曾押其所有物實屬違背條約無論租界地內
鹽觔是否應爲貴國人所有尙待解決即貴總領事置根本
上問題於不顧認爲該商所有此次該局亦僅處分其不法
之物與懲處不法之人自有區別此事非將租界內鹽灘管
轄權協商妥洽不能息無謂之爭議相應照覆貴總領事請
煩查照務希照前函將貴國政府對於此事主張早日提出
以便核辦 日本駐奉領事致軍督照會文云照得貴總督

並吉林將軍前在孟家屯及十里堡兩處設立東三省鹽務分局及吉林鹽捐分局凡輸入之鹽皆須檢查課稅一事本館即對兩局之開設於二月九日以公文第十一號抗議在案本月七日中二月二十五日在長春分館柴田主任電稱本月五日中二月十三日本邦商人欲將在金縣購買之鹽運赴長春因無奉天省內納稅之印票被孟家屯東三省鹽務分局將鹽扣留卽派館員前往理喻且直接與知府交涉乃知府以此事係奉貴總督並吉林將軍之命無論如何礙難返還等語回覆前來查關東洲製鹽課稅貴總督正與本官交涉交涉未了之間貴國官憲徵收鹽稅爲不當已於前次第十一號公文開議至本邦人雖有不正之行爲時然貴國官憲並不向

本邦官憲爲何等之交涉即扣留其所有物實爲違背條約
此事本邦商人所蒙之損害後日當要求賠償本官先此聲
明請查照可也 交涉局照復日本領事文云案奉軍督憲
札開以孟家屯鹽務分局沒收食鹽一事准貴總領事公文
內稱條約上僅有禁止外國鹽進口之規定至租界地所產
之鹽無何等可遵據之明文必定相當之辦法前此貴總督
閣下之提議本官亦贊成妥商在案今於此次商議尙無何
等之決定即將本邦人之鹽認爲私鹽差押沒收甚爲費解
本官對於本邦之人所有物不能認貴國有沒收之權貴國
所取之沒收行爲對我無何等之效力請速即飭令交還等
因飭令本局照催將租界地鹽灘早日提出協商并嚴禁日

商於未協議之時毋得私自再運奉此查租界地鹽灘管理之權商議既無何等之法定則日商本不應私行先運今來文一則曰本邦人之鹽不得認爲私鹽再則曰本邦人之所有物貴國無沒收之權是在商議未定以前貴代總領事已認定此鹽爲貴國之鹽條約上既有禁止外國鹽進口之規定則我國據此條約予以沒收安得謂無何等之效力相應照會貴代總領事迅將租界地產鹽營鹽管轄權限早日提出協商以前應禁止日商私行販運并望見覆

是月又有日商依田等私販之案

舊志光緒三十三年二月鹽務總局督辦史念祖呈云案據長春緝私分局王委員維墉稟稱本年二月初一日查有日

商運鹽共三十餘石細詢日商依田據稱係營口田佐洋行在復蓋一帶輾轉買受驗其印票均在限內數目亦屬相符因思該鹽雖出於日人之手然印票係華商裕發和戰文聚等名實係中國之鹽運售中國似非彼國鹽觔運入中國者所可比是以姑爲照印票章程辦理照驗放行惟事近交涉此後如再查日商持有華商之印票鹽觔或照驗放行或別有辦法之處敬乞批示遵循據此查食鹽一項係國家專利之品斷不容外人干預前與各國締訂約章均載在禁令不准各國商人運進出口誠以此端若開不特洋鹽奪我利權而走私夾帶或奸商託庇洋人種種弊端接踵而起此次日商依田運鹽雖持有印票限期數目相符究係外人販運與

約章不合本應扣留惟念該局尙未有辦法已經驗放不便深究再有此事即應扣留懲辦候咨行交涉總局照會日領事聲明嗣後日人零星食鹽准向各棧店購用倘係大宗鹽觔數過一石以外者應即禁止購運以符約章并飭沿海沿鐵路各廳州縣及各補徵分局傳諭各棧店一體遵照不准將大宗鹽觔售與日人理合呈請示遵 王維墉呈報本月二十三日書巡等在近局火車站查獲日商中馬熊依田由旅順運來鹽六十四包約二十餘石正在查問之時忽該日商暗僱火車四輛運出車站委員當即嚴飭巡差將該鹽全數扣留存局該日商隨亦來局面稱係在旅順運來鹽觔且無奉天捐票雖被扣留但該日商情似不服聲稱須赴長春